

Uteule wa Mbinguni

Kwa hiyo ndugu, jitahidini zaidi kufanya imara kuitwa kwenu na uteule wenu; maana mkitenda hayo hamtajikwaa kamwe—**2 Petro 1:10**.

Huu ndiyo uteuzi pekee ambao Biblia inauzungumzia. Tukiwa tumeanguka dhambini, tunaweza kuwa washirika wa asili ya Mungu na kupata maarifa ya juu zaidi kuliko mafanikio yoyote ya mafunzo ya sayansi. Kwa kushiriki mwili na damu ya Bwana wetu aliyesulubishwa msalabani, tutapata uzima wa milele. Katika sura ya sita ya Yohana tunasoma: “Aulaye mwili wangu na kuinywa damu yangu anao uzima wa milele; nami nitamfufua siku ya mwisho” (Yohana 6:54). “Roho ndiyo itiyao uzima, mwili haufai kitu; maneno hayo naliyowaambia ni roho, tena ni uzima” (aya ya 63).

Hakuna haja ya kukosa uzima wa milele. Kila mtu anayechagua kila siku kumjifunza Mwalimu wa mbinguni atafanya kuitwa na uteule wake kuwa thabiti. Hebu na tuinyenyekeshe mioyo yetu mbele za Mungu na kutafuta kumjua Yeye ambaye kumjua vyema ndiyo uzima wa milele.

“Jitahidini zaidi kufanya imara kuitwa kwenu na uteule wenu; maana mkitenda hayo hamtajikwaa kamwe. Maana hivi mtaruzukiwa kwa ukarimu kuingia katika ufalme wa milele wa Bwana wetu, Mwokozi wetu Yesu Kristo” (2 Petro 1:10, 11).

Zifuatazo ni karatasi zako za bima ya maisha. Hii si sera ya bima thamani ambayo mtu mwingine anaweza kuipokea baada ya kifo chako; ni sera inayokuthibitishia *uzima* unaolinganishwa na uzima wa Mungu—yaani uzima wa milele. Hakikisho lililoje! Tumaini la pekee! Hebu na tudhihirishe kwa ulimwengu daima kwamba tunaitafuta nchi iliyo bora, nchi ya mbinguni. Mbingu imeandaliwa kwa ajili yetu na tunahitaji kuwa na mahali ndani yake. Hatuwezi kumudu kuruhusu kitu chochote kututenga mbali na Mungu na mbingu. Tunapaswa kuwa washirika wa asili ya Mungu katika maisha haya. Kaka na dada, tunalazimika kuishi mara moja tu. Hebu na tuyafanye kuwa maisha ya wema, maisha yaliyofichwa pamoja na Kristo ndani ya Mungu!

Tukiwa tumeungana tunapaswa kusaidiana sisi kwa sisi ili kufikia ukamilifu wa tabia. Ili kufikia hapa, tunapaswa kuacha kutafutana makosa. Tunaweza kusonga mbele na mbele zaidi ili kufikia ukamilifu, mpaka hatimaye tutasaidiwa sana ili kuingia katika ufalme wa mbinguni.